

prout divisionem importat ab aliis. Cetera defini-
entur suo loco.

UNIVERSALIA seu **PRAEDICABILIA** sunt quae communiter pluribus inveniri, ac de pluribus dici possunt. *Praedicabilia* nuncupantur, quia dicuntur in odos quibus omnia attributa de ente aliquo *praedicari* et ad ipsum pertinere valent. Quinque autem modis attributum aliquod enuntiari potest de subjecto, scilicet veluti ipsius *genus*, vel uti *species*, vel uti *differentia*, vel uti *proprium*, vel uti *accidens*. Inde quinque sunt *praedicabilia* seu *universalia*: *genus*, *species*, *differentia*, *proprium*, *accidens*.

Genus est unum aptum inesse pluribus specie differentibus, et praedicari de illis *in quid* incomplete. *Ex. animal. Aliter*: Est id quod pluribus speciebus invenitur commune.

Species est unum aptum inesse pluribus numero differentibus, et praedicari de illis *in quid* complete. *Ex. homo, brutum. Aliter*: Est totum id quod communem plurium individuorum essentiam constituit.

Differentia est unum aptum inesse pluribus et praedicari de illis *in quale quid*. *Ex. rationale quo differunt brutum et homo. Aliter*: Est id per quod unaquaque species discriminatur ab aliis speciebus quae sub eodem genere continentur.

Proprium est unum aptum inesse pluribus et praedicari de illis *in quale* necessario. *Ex. capacitas sciendi in homine. Aliter*: Est id quod ab essentia necessario dimanat.

Accidens est unum aptum inesse pluribus et praedicari de illis *in quale* contingenter. *Ex. doctrina in homine. Aliter*: Est id quod esse potest in re vel ab ea abesse, salva essentia.

Species infima ea est sub qua nulla alia species collocatur, quaeque immediate sub se individua continet. *Homo* est species infima.